

林文忠公政書

勦辦騰越廳邊外野夷情形摺

奏爲騰越廳界外野夷膽敢攔入邊地擄搶各寨居民派員帶練出卡痛加勦辦餘匪畏威歸順沿邊悉獲安恬恭摺仰祈

聖鑒事竊照雲南騰越廳地方三面通夷爲迤西極邊之區界連緬甸所屬沿邊卡外別有各種野夷旣非外域齊民又不歸土司管轄雜居山谷分寨自立頭人其性貪暴兇頑每乘虛突至漢屯搶擄人畜財物因營汛不敷分布曾於道光

初年請項建置碉堡雇練駐防要隘而山徑叢
雜該匪輒於無練之處覓途潛出肆擾節經堵
緝驅逐尙不致大爲邊患乃自上年秋冬以來
有古勇蓋西邊外之老草坡熊家山等處野匪
疊糾多人至古勇河西栗子園崩麻各漢寨先
後擄去男女二十六丁口并牛馬牲畜財物報
經古勇士弁協同屯練追捕無獲稟由鎮道府
廳會議以該處距各營較遠山徑荒僻險易難
知若調官兵剿捕既恐多延時日且不諳習路

途不如就近抽撥屯練札調能事備弁官管帶
進剿可期事半功倍查有附近之明光隘土守
備左大雄勇敢有爲疊次出師著績堪以率領
各土弁管帶勁練出卡相機剿辦應需鹽糧由
騰越廳籌捐供支先後具稟請示臣等核其所
請實爲肅清邊境要務當卽批令督同妥速辦
理去後旋據該鎮道府廳等節次稟報本年正
月十九日調齊勁練五百名交左大雄管帶進
剿二月初四日行抵老草坡野匪已有準備早

經挖濠樹柵出而抗拒該土弁親帶各練奮勇
攻擊槍礮齊施各匪敗竄入柵砍斃二十餘人
帶傷甚多隨乘勢圍柵放火焚燬匪巢各匪分
竄至大竹蓬等八寨并西山九寨該土備又以
次進攻各寨野夷始知畏懼邀請安分寨頭詣
營投誠查該處夷風遇有齊心禁戒之事須抱
大石發誓方見真誠其各寨中惟六頂之大野
貫與習董之大頭目平日尙知信義當飭該野
貫等如能擔保各寨不敢滋事誓石投誠方可

允準該夷等俱願遵照隨卽獻還所擄男女八
丁口牲畜六件查明原主給領其餘財物據稱
係熊家山等野匪擄去旋卽移營往攻於二月
初八日進至熊家山探知該野匪所居懸巖陡
壁已將出入要口深濠固塹且恃有怕洒等五
寨爲羽翼負隅不出該土備帶練分攻各匪亦
分股抵禦騰越鎮總兵拴住接據稟報恐左大
雄深入險寨練力不敷又復商令該廳加調屯
練五百名往助左大雄得添新練遂逼近要口

分爲五路進攻二十二日該匪出巢拒敵各練
丁迎頭奮擊殲斃頭裏紅巾首匪二名及匪眾
數十名各匪退回口內迫夜潛出劫營練丁先
已防備極力轟拒野匪撲營愈急經六品軍功
頂帶練總董大文瞥見指揮放槍迎擊并自行
抱石打中爲首一匪腦後倒地詎匪夥從旁放
槍致董大文額角受傷被害眾練開柵齊出抄
截環攻始將各匪打退平明查看山箐內有匪
屍二十餘具仍復連日進攻斃匪無數土練亦

聞有傷亡是月二十九日始將熊家山匪巢焚燬卽在該處紮營以堵怕洒等寨往來要路其中安分野夷恐被玉石俱焚紛紛詣營求請投誠歸化該土備慮其挾詐令通事逐名究詰據供熊家山滋事匪首一名茶山老五一名阿五其怕洒等寨匪首名爲總頭老五與各小頭目等均先後被殲身死餘皆逃散伊等恐被剿滅趕將寨匪所擄之男女十八丁口并牛十七件獻出求免盡勦又查出寨匪所留之漢奸馬六

張小老二人緝送請辦該土備允其所請當將人畜交收訊據漢奸馬六張小老供認均係沿邊民人向走夷方貿易因虧本負欠難歸潛入野山交結夷匪指引搶擄冀圖得贓分肥其送還被擄民人楊啓元楊官文余小老余小二蔡大劉九榮邵小三劉五斤劉鳳英劉小三張邵有張富尹益李國棟張聯榜張喬科金洪榮十七名并婦女何劉氏等九名逐一訊據供稱先後遭匪擄去扣留役使并欲勒贖該婦女等均

未被匪姦污餘供大略相同其代老草坡等處
擔保求誠之六頂野貫實董頭目十人亦爲熊
家山等寨懇求免勦情願出具永不滋事刀標
木刻誓石投誠如再爲匪惟伊十人是問察其
情詞不至反覆隨飭傳齊各野山頭目與邊民
同至漢夷交界之三官殿宣示恩威嚴加傳諭
責成六頂習董各頭目分寨管束永不准其入
邊搶擄滋事各野夷咸皆畏服叩頭盟誓所具
刀標木刻均於邊隘立石示眾沿邊地方已極

安靖遂於四月初六日撤練回至廳城查明此次陣亡除練總董大文外尙有練丁六名又受傷練丁十八名分別卹賞所有一切經費據署騰越同知鄧墀稟請悉由該廳籌應等情臣等查此次該土備左大雄自正月中旬帶練出剿至四月初間竣事各寨野夷除焚斃殲斃外均已畏威悔罪立誓輸誠洵能遠振軍威又安邊地此後仍須益嚴約束倍緊巡防所有各卡隘練丁暨應責成騰越鎮將會廳逐一點驗凡從

前疏縱夷匪及現在年力就衰者均從重責革
究辦其撫夷備委中據查有孟學鄒吳正傳楊
鎮邦及練頭孟效鄒洪德恩五名此次俱甚出
力但從前夷匪擾害邊民何以不能有犯卽懲
應令根究明白分別功罪以示勸懲漢奸馬六
張小老勾結外匪滋事已據自行供認自應歸
於迺西匪犯案內飭道審明就地懲辦傷亡練
丁咨部請卹其六品軍功頂帶練總董大文親
手擊斃首匪旋因中槍陣亡可否仰懇

天恩照土千總例賜卹至明光隘土守備左大雄前
在永昌等處軍營屢經出力疊蒙

賞戴花翎并加宣撫使銜該土備深知感奮茲又收
服各寨夷匪可否再懇

恩施賞給巴圖魯名號以示激勸其騰越鎮總兵拴
住迤西道王發越永昌府知府張亮基署騰越
廳同知霑益州知州鄧墀籌商軍務督率均尙
有方可否請

旨交部均予從優議敘之處出自

聖主恩慈所需軍費既經籌捐辦理并請免其造冊
報銷除再查明練丁中超眾出力之人咨部量
給頂帶外所有勦辦邊外夷匪竣事邊疆綏靖
緣由

臣

等謹合詞恭摺具

奏伏乞

皇上聖鑒訓示謹

奏

林文忠公政書

丙集

雲貴奏稿

七

他郎廳新礦酌更營汛摺

奏爲普洱府屬之他郎廳地居邊要現在督辦開
採更宜駐以重兵擬移遊擊大員並請酌更營
制以資彈壓而重邊防恭摺奏祈

聖鑒事竊臣等於本年二月會奏遵

旨試行開採摺內聲明他郎通判所轄之坤勇等會
出金砂因游民私採鬪爭將山封閉但金砂不
時湧現難免去者復來又近處勘有草皮銀礦
現亦有人偷挖此次官爲督辦必須多兵彈壓

容臣等斟酌調遣一俟布置定局再行縷析奏

聞在案維時營制未經議定先於附近該廳之普洱

臨元二鎮元江新習二營共派兵三百名交護

臨元鎮左營都司陳國樑帶往駐劄暫爲彈壓

並委候補通判卓標永平縣知縣文定仲各齎

告示令箭前往會同他郎通判倭克金布選充

頭人課長議立約束章程並責成鎮將道府各

大員就近稽查督辦惟念兵雖暫駐究非經久

之謀而地在沿邊尤在藩籬之固查他郎地方

遼闊東南兩境遠與老撾交趾暹羅緬甸有路相通就邊防而言本應以重兵扼要駐守今該處文員係普洱府之通判分駐而同城之武汛千總又不歸於普洱鎮管轄而係臨元鎮所屬之元江營參將分弁赴防是文武雖在一城而一則隸於臨元一則隸於普洱遇有要事爲文職者固可於駐劄普洱之道府稟請遵行而武職營汛事宜普洱鎮不能過問須由元江營轉稟臨元鎮指示辦理道路旣多紆折核轉更致

耽延在無事之時或尙不甚緊要值此新開礦
廠人數日見眾多尤應文武和衷聯爲一體始
免事權歧出呼應不靈且查滇省額設六鎮總
兵本皆有中左右三營以符規制惟普洱鎮左
營遊擊因與威遠新習兩營屢次互相改換故
現在該鎮只存中右二營與各鎮殊不一律似
應復還普洱左營遊擊以昭體制而重邊防惟
營缺未敢擅添自應量爲移改因查新習營遊
擊向係駐劄元江州屬之新平縣城而其分防

之習我縣汛則又屬於臨安府是彼處文武所
轄亦復兩歧查新平係在元江腹內又有他郎
當其東南以爲屏蔽前因境內有魯魁夷牢兩
山易藏匪類是以曾設專營今新平地方較之
昔時大爲安靜其習我尤爲腹地更可將汛務
歸入臨元鎮標所有新習遊擊一缺似可移駐
他郎作爲普洱左營遊擊廠務既資彈壓邊防
亦更森嚴以視目前派往客兵祇係暫時駐劄
者自必倍形得力第遊擊旣移其中軍守備一

員自應隨往又左右哨兩千總亦應酌帶一人
與原駐他郎城內之千總各分左右哨至元江
營本有把總一弁帶兵四十五名分駐他郎之
阿墨汛又有分駐邦轟宿南兩汛之外委二人
共帶元江兵六十五名今應移歸新設遊擊管
轄又普洱中營亦有一把總一外委帶兵七十
九名分駐通關哨汛距他郎較近亦應歸於該
遊擊管轄此外尚有應帶弁委及酌添馬步各
兵或由新習原營移撥或由普洱鎮標改添均

俟該鎮將議覆至日另咨兵部立案惟新平舊分十汛地勢亦屬綿長若遊擊移駐之後僅以千把總領其汛地恐職分太微難資管束應另移守備一員作爲總轄行據臨元鎮總兵李能臣稟覆該標左營本有都司可以經管錢糧等事其左營守備尙可通融移駐新平作爲元江營右軍守備仍隸該鎮統轄其元江營參將應卽改名元新營以符名實以上擬更營制大概情形經臣等飭據藩臬兩司暨督糧道轉移臨

元普洱鎮道並行該處府州分別籌議詢謀僉
同茲據該司道等會詳請

奏前來相應仰懇

聖恩俯念邊疆營汛因時制宜準將原設新習營遊
擊移駐他耶作爲普洱鎮左營遊擊其新平汛
駐劄守備等員弁歸於元江營管轄將嶺峩汛
歸入臨元鎮標如此量爲轉移則文員之該管
道府與武員之該管鎮將悉歸畫一似公事可
免歧悞而邊境更冀肅清如蒙

俞允所有衛署兵房凡可彼此互換者皆毋庸另議
惟他郎城內應添蓋遊擊守備衙署及自他郎
城外至坤勇箐礦廠等處如有扼要控制應須
建蓋汛房者一切工料所需均由臣等督屬籌
捐辦理惟營分職名有應酌改之處應再咨部
酌換關防等項以昭信守至官兵係通融移撥
并無格外加添其原支俸餉廉費各銀無所增
損惟查鎮標官兵領餉例由中營照數請領轉
給開支而他郎距省程途較之普洱中營稍近

數站若將該營俸餉解回中營之後又解左營未免徒多往返擬令嗣後該鎮標遣官來省領餉回鎮卽於路過左營之便先將該營俸餉等銀交給該遊擊具領收放以省重疊來回又兵米一項從前他郎駐兵本少該廳徵放本色之外尙有餘存本折分別撥解今移駐兵數旣已增多該處糧販本稀自應責令他郎通判概徵本色以資散放其由普洱元江撥出之兵該原營應減本色改折徵解至各營汛軍裝器械亦

可酌量抵換彼此互改營名毋庸紛紛搬移以
歸省便其餘未盡事宜另容隨時酌核分別
題咨辦理總期開廠籌邊兩有裨益以仰副

聖主整飭營伍綏靖地方之至意所有會籌移駐緣
由臣等謹合詞恭摺具

奏伏乞

皇上聖鑒勅部核覆施行謹

奏

訪獲他郎廳廠匪黃應倡等大概供情摺

奏爲他郎廳開礦事宜甫將章程立定茲訪明曾經滋事之廠匪拏獲多名飭解普洱府嚴行審辦務使廠民知儆謹將大概情形恭摺奏祈聖鑒事竊臣等前經訪知他郎廳之坤勇箐出有礦硐當卽欽遵

諭旨試行開採擬選殷實良善之戶作爲頭人招募砂丁逐層約束並以前此偷挖滋事驅逐復來者亦當訪拏究辦以示懲儆業經會摺奏

聞在案嗣據委員通判卓楨知縣文定仲前後會議章程十餘條竝將在廠各項人丁名冊查明籍貫年貌詳細開報核其逐層管束之法每砂丁二十五人設有丁目一名每丁目十人復設丁長一名積至砂丁一千人另設總頭一名而仍選立客長五名總司稽核又責成鑲頭報挖新礦鑪頭請票扯火課長掌秤抽收彼此互相稽查隨時示以賞罰復以課書練役分段梭巡雖事務甚繁而約束尙無鬆懈并據該委員等稟

稱金砂實極微細每日淘水搖牀所得僅以分
釐計勢難按則抽金惟銀礦漸由子櫃而得正
櫃目下丁力加多可期進山接礦請將金課亦
核作銀抽解以免瑣屑畸零查其所稟委係實
情當卽批准照辦惟訪聞原先偷挖之人多欲
朦混入廠此內有曾糾眾互鬪致相殘殺者亦
有擾害邨莊被人控告者目下若不先爲訪拏
則此輩自矜得計必致故惡復萌而眾人相率
效尤亦恐逞強滋事

臣

等飭據普洱臨元他郎

等處文武先後密稟訪有外來滋事之匪首黃
應倡於上年十二月閒未經奉文開採卽欲恃
強先來挖礦率夥盤踞罵泥街該處居民被其
擾害協力驅逐本年二月初閒與其黨邱綱移
至戛楚地方復圖占擾又有臨安匪徒支老五
等及元江他郎夷匪楊卜喇等皆係著名之犯
與外來各匪在麻栗樹石頭寨等處分類糾鬪
互有殺傷其乘機分竄偏僻邨寨勾結搶擄者
先經署普洱府崔紹中訪聞會督思茅甯洱廳

縣拏獲劉大蒲煞等三十四名訊出各匪首要
姓名稟請四路圍緝適臣等因開礦需兵彈壓
已會調普洱元江官兵各一百名臨元新習官
兵各五十名赴廠駐劄當飭帶兵各將備順途
訪查並令咨會文員一同實力搜捕旋據臨元
鎮總兵李能臣會同署普洱府崔紹中署元江
州李杰署他郎通判倭克金布前署他郎通判
沈世良并督令護元江營參將常興署新習營
遊擊察興阿護臨元鎮都司陳國樑等各分途

帶領弁兵差役先後拏獲外匪黃應倡邱綱等四十六名臨安匪徒支老五等二十一名元江夷匪楊卜喇等十一名起獲槍礮藥鉛刀矛多件解至他郎會同研審各供認互鬪搶擄數次其當場致斃屍身或自行燒燬或彼此殘棄或尙有掩埋處所可以創驗并搶劫卹寨情形亦據厯厯指認惟被害事主多未呈報到官不能知其姓名現在傳諭各卹寨居民據實補報計各文武所獲現犯共一百一十二名已據署普

洱府崔紹中稟請親自馳至普洱提同前獲各
犯確審懲辦尙恐查拏之時有匪犯乘閒逸出
仍飭各營汛分途嚴緝其已經到廠之官兵卽
令留駐鎮壓經此一番訪拏廠務頓覺森嚴所
有新招廠民見先前滋事匪徒多被緝獲咸知
觸目警心悉就約束廠內倍形安靜雖金砂現
極有限而銀廠頗有起色可期成效日臻除飭
迤南道督同普洱府縣審明確供妥速定擬詳
辦俟定案時由臣等勘明再行具

奏外謹將現在訪獲舊日廠匪多名緣由先行恭摺具

奏伏乞

皇上聖鑒謹

奏

保山縣城內回民移置官乃山相安情形摺

奏爲保山縣城內回民自移置官乃山以來已逾
一載察看情形妥協可期久遠相安謹將原辦
緣由奏明立案仰祈

聖鑒事竊臣等於上年會奏永昌善後案內議請添
移營汛弁兵聲明保山縣轄之官乃山因安插
回民二百餘戶尙有陸續前來者擬添兵五十
名連原駐之三十名派一把總帶領以資彈壓
等情已蒙

勅部覈議覆准在案彼時回民移居未久尙須細察情形未敢以試辦之章程遽作常行之定準節經諄飭永昌府知府張亮基就近督縣加意撫綏認真彈壓計上年四月安置之後至今已越一年疊據稟報該回民二百餘戶在官乃山墾種爲生均極守分安業堪以永遠居住等情臣等查此案移置之由因道光二十五年九月閒保山城內回民被該處七哨匪徒挾仇殘殺一次迨二十七年甫經招復又於十二月初一日

因哨匪打奪解省人證復恃眾入城搜殺一次
雖被殺由於報復死者亦非概屬無辜而受害
情形實堪憫惻除業經盡絕之戶無可挽回外
其有他出始歸以及藏匿逃亡遺存丁口悉經
由官訪明捐貲撫卹以軫餘生至二十八年春
間臣林則徐親往迤西督兵查辦於痛勦彌渡
之後直擣七哨地方哨匪始懾軍威俯伏歸命
當時拏獲辦罪至四百餘名之多七哨經此痛
懲不敢復逞兇頑之習本擬招復逃亡回眾仍

返故居惟查房屋被焚早成灰燼若令自行建
蓋已屬力所未能且與漢民界址毘連清釐匪
易一時既虞其尋衅日久更難以相安故於軍
務將竣之時卽另籌安置保回之地嗣據地方
文武暨各委員覓得保山所轄距城二百餘里
之官乃山一座周圍約十餘里外狹中寬前隔
潞江後依雪山雪山之巔石崖陡險雖有獐獐
夷人窩居其上向不與民人相通其自半山中
腰下至臨江間有平曠地土堪以墾種因而外

來無業客民單身赴彼或種包穀雜糧或植大小果樹先搭棚寮棲止漸蓋土屋草房究因中隔潞江往來未能甚便該客民等仍不樂久居隨訪得有楊育春白奉禮等均願將自墾成熟之地暨果樹寮房悉行折價遷讓或以城鄉產業與之掉換亦所樂從當查該處山場既有田畝樹株按年可收花息并已種將熟之雜糧果實均願折價賣給回民到彼卽無枵腹之虞若漸墾漸多更可長資養贍因詢保回頭人童俊

劉耀宗等以保山之清真寺舊有零星公產其各鄉亦有故絕回戶遺產如願公同估價與官乃山產業房產互相掉換便可官爲經理伊等當卽允從其價值除互抵外尙有不敷由官湊捐給付遂將官乃山一座全作保回聚居之所除有他處親戚可依不愿前往者聽其自便外凡願移之回戶皆按大小人口官給盤費經署保山縣知縣韓捧日署永昌協副將桂林等將該回民二百餘戶分起押送前往到後仍酌給

三箇月口糧俾得從容治產此上年安置保山
回戶之情形也嗣又添撥把總一員先後帶兵
八十名歸於原設之舊乃汛駐劄就近巡防該
回民等益知官爲保護得以久安生業陸續去
者復有數起自係知爲樂土彼此相招查該處
去秋包穀雜糧均稱豐熟果樹亦皆獲利今年
墾種之地比較去年更多將來戶口繁滋該山
亦足資其力食與山巔之獐獐夷人及江外之
土著漢民均無輻輳而保山城哨相距甚遙更

無虞其生衅是回民安置在此似可決爲久遠之圖雖不愿者本不强其前來而已來者定可安於無事矣惟其先墳墓向來本在保山當二十五年互鬪之時回匪之燒漢屋者極多而漢匪之掘回墳者尤甚屍骸堆積令人不忍觀聞臣等面囑該府張亮基督屬妥爲修掩張亮基到任後卽與署保山縣陸葆捐發廉銀選擇公正紳耆分赴各山將被挖回墳逐一修砌悉還其舊不獨屍骨全無遺棄并棺柩每與更新

統計自夏至冬共修回墳九千餘家該處事定之後有回民赴保山祭掃者府縣派差照料卽以暗杜衅端該回民見其墳冢新修比前加勝亦皆同聲感激并可消釋前嫌矣又據張亮基稟稱保山回戶中未經故絕之人遺有田產上年軍務竣後曾經委員分門清查核與該回頭人查報大數相符當卽由官派佃代種收取租銀尋覓外出各回民寄交該處地方官給領惟思回戶業經他徙若將零星田產留在保山內

有狡黠之徒未忘舊衅卽難保不藉此爲由以
清租爲尋衅之地不如查起原契官爲覓售其
無原契者亦由官估價值分別變賣節經頭人
傳諭業已允從者多惟聞有力之回本在他處
經營貿易有不必急於變產而尙觀望遷延者
若不催令一體辦理轉恐退有後言是以現仍
傳覓本戶回民諄切曉諭令其出售零產以斷
葛藤總期保邑漢回各遂其生永無可開之衅
以仰副

聖主綏安邊圉一視同仁至意所有續辦善後緣由
臣等謹合詞恭摺陳并咨部核明立案伏乞
皇上聖鑒謹

奏

密保永昌府張亮基片

再永昌連年滋事民幾不知有官實由吏治因循以致獷悍成風積重難返上年甫經懲創亟須爲地擇人仰荷

聖恩準以臨安府張亮基調補永昌府缺該府自到任後辦理不遺餘力於地方之利弊無不訪察周知於風俗之澆漓無不革除務盡如昔時牛叢香把拜會結盟斂費賽神信妖惑眾諸惡習皆能令行禁止杜絕根株一有勾結潛滋卽被

查拏懲辦又將各邨寨槍礮火藥全行搜繳入
官產硝各硃全封軍火無從私製至該處向有
教演拳棒聚唱小說之所今則改爲義學又有
糾詐大戶引誘游女之風今則厲其鄉禁徭役
之累民者設法裁革之道途之險巇者捐貲平
治之合諸_臣等正摺所陳安置回戶修護回墳
勸售回產等事無非任勞任怨期以永杜衅端
訪查彼處民情於該府懷畏兼深漢回如一旦
不獨永昌一郡如是卽附近之順甯蒙化等屬

亦莫不然是張亮基調任年餘竟能大挽積年
難挽之習臣等職司察吏似此實在得力知府
不敢壅於

上聞惟地方正當起色之時仍應責成經理將來遇
有兼轄迤西及統轄滇省之任如蒙

簡畀鴻慈似張亮基皆可力圖報稱以收得人之效
臣等爲邊疆需才起見不揣冒昧謹合詞附片
密陳是否有當伏祈

聖鑒謹

奏

道光十三年十一月十三日江蘇巡撫奏
徐片奏

再江蘇連年災歉民情竭蹶異常望歲之心人
人急切今夏雨暘時若滿望得一豐收稍補從
前積歉乃自六月閒江湖盛漲沿江各縣業已
被災其時蘇松等屬棉稻青葱猶冀以江南之
贏補江北之絀蓋本省漕賦在江北僅十之一
而江南居十之九故蘇松等屬秋成關係尤重
惟所種俱係晚稻成熟最遲秋分後稻始揚花

偏值風雨陰寒遂多秀而不實然大概猶不失
爲中稔迨九月後仍復晴少雨多晝則霧氣迷
濛夜則霜威寒重雖已結成顆粒僅得半漿鄉
農傳說暗荒臣猶不信于立冬前後親坐小舟
密往各處察看見一穗所結多屬空桴半漿之
禾變成焦黑實先前所不及料然猶盼望晴霽
庶可收曬上馨不意十月以來滂沱不止迅雷
閃電晝夜數番自江甯以至蘇松見聞如一臣
率屬虔誠禮禱悚懼滋深雖中間偶爾見晴而

陽光熹微不敵連旬盛雨在田未割之稻難免
被淹卽已割者欲曬無從亦多發芽霉爛鄉民
烘焙勉強試礬而米粒已酥上礬卽碎是以業
戶至今未得收租臣先因欽奉

諭旨新漕提前趕辦當經欽遵嚴飭各屬勒令先具
限結將何日開倉何日徵兌何日開行登載結
內並聲明如有逾期願甘參辦字樣呈送如不
具限卽以才力不勝立予參撤不使戀棧貽誤
各屬皆具結遵辦然賦從租出租未收納賦自

何來當此情形屢變之餘實深焦灼又各屬沙地祇宜種植木棉男婦織紡爲生者十居五六連歲棉荒歇業生計維艱今年早花已被風搖而晚棉結鈴尙旺如得晴暄天氣猶可救之桑榆乃以雨霧風霜青苞腐脫計收成僅止一二分小民紡織無資停機坐食且節候已交冬至卽趕緊種麥猶恐過時況又雨雪紛乘至今未已田皆積水難種春花接濟無資民情更形窘迫此在臣奏報秋災以後歉象加增日甚一日

之情形也地方以秋災不出九月不許妄報原
係遵守定例然值連陰苦雨人心難免惶惶外
縣城鄉不無搶掠滋鬧之事臣飭委文武大員
分段彈壓現已安靜除寶山鄉民因補報歉收
擠至縣署一案另摺

奏明嚴拏提審外其餘情節較輕例不應

奏者亦當隨案照例懲辦以戢刁風惟據續報歉
收情形勘明屬實不得不照續被災傷之例酌
請緩徵正在繕摺具

奏聞承准軍機大臣字寄欽奉

上諭近來江蘇等省幾于無歲不緩無年不賑國家
經費有常豈容以展緩曠興年復一年視爲相沿
成例並奉

諭旨該督撫等不肯爲國任怨不以國計爲亟是國
家徒有加惠之名而百姓無受惠之實無非不堪
官吏私充囊橐大吏祇知博取聲譽等因欽此欽
遵臣跪誦之下兢凜慚惶莫能言狀伏念臣渥
蒙

恩遇任重封圻且居此財賦最繁之地乃不能修明
政事感召和甘致地方屢有偏災極知經費有
常而不得不爲賑恤蠲緩之請撫衷循省已無
時不汗背靦顏乃蒙

皇上不加嚴譴

訓飭周詳凡有人心皆當如何感愧況臣受
恩深重曷敢自昧天良若避怨沽名不以

國計爲亟則無以仰對

君父卽爲

覆載之所不容臣雖至愚何忍出此卽如上年臣到蘇之後秋成僅六分有餘而蘇松等四府一州於蠲免新漕之外尙帶運十一年畱漕二十萬石合計米數將及一百八十萬爲歷來所未有之多原因

天庾正供不敢不竭力籌辦其辛卯年地丁督同藩司陳鑾摧提嚴緊亦于奏銷前埽數全完業經專摺奏蒙

聖鑒在案竊惟盡職之道以

國計爲最先而

國計與民生實相維繫

朝廷之度支積貯無一不出于民故下恤民生正所
以上籌

國計所謂民惟邦本也本年江湖盛漲係由黔蜀
湖廣江西安徽各省大水併入長江其破圩淹
灌等處原不止上元六縣臣所請撫卹第舉其
最重者而言仰蒙

皇上天恩准給口糧災黎感淪肌髓嗣經官紳捐資

撫卹臣卽復行

奏請毋庸動項將所發上元江甯句容江浦儀徵
五縣銀兩畱爲辦賑之需其丹徒一縣捐項已
有五萬餘兩並足以敷賑濟當將前發之銀提
回司庫凡此稍可節省之處均不敢輕費

帑金惟于災分較重又難猝集之區則不得不酌
給例賑臣等另摺請撥之十三萬兩僅分給十
二縣衛軍民雖地方廣而戶口多亦只得挪節
動撥此外無非倡率勸捐以冀隨時接濟惟頻

年屢勸捐輸卽紳富之家實亦力疲難繼查道光三年大災通省捐至一百九十五萬餘兩至道光十一年災分較前相埒僅能捐至一百四十六萬餘兩其餘各年捐項較絀此時間閭閻匱乏勸諭愈難然覩此情形待哺災黎不能不勉籌推解臣與督臣率同司道等官各先捐廉倡導以冀官紳富戶觀感樂施凡此情形皆人所共覩不肖州縣捏災冒賑地方刁生劣監豈肯不爲舉發而紳富之家又安肯聽其勸諭捐貲

助賑至再至三且捏災而轉自捐廉似亦無此
愚拙之州縣也至展緩之舉祇能緩其目前仍
須徵于異日非如蠲免之項慮有侵吞州縣之
于錢漕未有不願徵而願緩者至必不得已而
請年復一年則地方凋敝情形早已難逃

聖鑒然臣初亦不料其凋敝之一至于此是今情勢
瀕于決裂時刻可虞臣不得不將現在實情爲
我

皇上密陳梗概查蘇松常鎮太倉四府一州之地延

表僅五百餘里歲徵地丁漕項正耗額銀二百數十萬兩漕白正耗米一百五十餘萬石又漕贈行月南屯局恤等米三十餘萬石比較浙省徵糧多至一倍較江西則三倍較湖廣且十餘倍不止在米賤之年一百八九十萬之米卽合銀五百數十萬兩若米價昂則暗增一二百萬兩而人不覺況有一石之米卽有一石之費逐層推計無非百姓脂膏民間終歲勤勞每畝所收除完納錢漕外豐年亦不過僅餘數斗自道

光三年水災以來歲無上稔十一年又經大水民力愈見拮据是以近年漕欠最多州縣買米墊完畱串待徵謂之漕尾此卽虧空之一端曾經臣縷晰

奏聞然其勢已不可禁止矣臣上冬督辦漕務將新舊一併交幫嗣因震澤縣張亨衢辦漕遲誤奏參革審而漕米仍復設法起運不任短少皆因正供緊要辦理不敢從寬也今歲秋禾約收已遜去年茲復節節受傷發芽霉爛詢之老農云

現在縱能卽時趕曬糟朽之穀比之上年每畝
已少收五六斗就蘇州一府額田六百萬畝計
之卽已少米三百餘萬石合之四府一州短少
之米有不堪設想者民間積歉已久蓋藏本極
空虛當此秋成之時糧價日昂一日實從來所
未見來歲青黃不接不知更當何如小民口食
無資而欲強其完納卽追呼敲扑法令亦有時
而窮前此漕船臨開有缺米州縣尙能買補近
且累中加累告貸無門今冬情形不但無墊米

之銀更恐無可買之米曩時蘇松之繁富由于
百貨之流通挹彼注茲尙堪補救近年以來不
獨江蘇屢歉卽鄰近各省偏災布疋絲綢銷售
少權子母者旣無可謀之利任筋力者遂無可
趁之工故此次雖係勘不成災其實困苦之情
竟與全災無異臣惟有一面多勸捐資妥爲安
撫一面督同道府州縣將漕務設法籌辦總不
使藉口耽延但本年已請緩徵之處尙不過十
分中之一分有餘此外常鎮等處亦已紛紛續

稟臣核其情形略輕者無不先行駁飭但天時
如此日後情形如何臣實不能豫料晝見陰霾
之象自省愆尤宵聞風雨之聲難安枕席並與
督臣陶澍書函往復於捐賑辦漕等事思艱圖
易反覆商籌楮墨之間聲淚俱下從此卽能晴
霽歉象尙不至更加如其不然臣惟有再行據
實

奏聞仰求

訓示遵辦大江南北各省通衢且中外仕宦最多一

切實情難瞞眾人之耳目臣如捏飾非無可以告發之人我

聖主子惠黎元

恩施無已正恐一夫不獲是以察厥務廣但民間困苦顛連尙非語言所能盡本年漕務自須極力督辦而觀此景象時時恐滋事端至京倉儲蓄情形臣本未能深悉倘通盤籌畫有可暫紓民力之處總求

恩出自天多寬一分追呼卽多培一分元氣況

天心與

聖心相應定見祥和普被屢慶綏和長使

國計民生悉臻饒裕臣不勝延頸頌禱之至謹附
片奏陳伏乞

皇上聖鑒謹奏

道光十五年九月初一日奉

前部院批蘇藩司詳豁免道光十年以前積欠
辦理情形由

批開

據詳查辦豁免積欠已通飭各州縣先將實欠
數目開具印摺徑送一面開冊同串簿送該府
州盤查加結轉詳其太倉州民欠責成松太道
查辦並飭承將司案各數豫行查出一俟屬冊
到時即可核對不準如上屆之遲延等情所辦

均屬得要至九月二十五日以前之限既難趕
副所有秋災一案祇可將道光十年以前錢糧
聲請歸入豁免案內查辦亦自無礙但各州縣
疲玩性成凡遇查辦事件無不任意宕延若不
勒限嚴催勢必仍前遲誤而曠日持久益恐弊
竇叢生設遇更調交卸延壓更甚上屆江蘇覆
奏在各省到齊之後殊不成事且上屆奉豁年分
有二十二年之多此次年分較少斷不可以上
屆爲比該司務當嚴飭各屬遵照所頒冊式趕

緊查明實欠在民確數迅卽開具印摺通送查核一面責成該管府州及管轄直隸州之巡道就近弔查印串簿據按款核對勒限開造清冊加結轉詳該司仍卽督飭司承先將司案各數豫行查出以便屬冊到時卽行按款覆覈攢造司冊迅速詳送

奏者切勿稍仍延緩仍督承將上兩屆豁免各卷遵照前札迅卽抄錄呈送以備查覈毋遲並候督部堂批示繳

道光十五年九月十六日奉

林前部院批蘇松常鎮太五府州會稟豁免積年

民欠查辦章程清摺由

批開

據稟會議查辦積欠章程七條在該府州等期
於覈實稽查使官民兩無遺累其意誠善惟本
部院細加察覈似覺意美而法未良不得不爲
明白指示如 第一條議請設局委員查辦以
期迅速並謂上屆卽係如此辦理本部院行轅

現無案卷不知上屆嘉慶二十三年果否設局查辦即使設局屬實而上屆遲之七個月之久始行覆

奏則設局之不能迅速亦已明矣且查報由于州縣而盤覈責在府州若省中設立總局則各屬均存推諉之心既可卸責於前更不免藉口於後而局員局書勢必紛紛多派備添薪水紙張之費司庫本無閑款各屬又捐解不前籌墊透支終貽後累而多設一日之局卽多增一日之

費更難保局中胥吏不以駁剔爲耽延是開局
易而撤局難欲速反遲適以遂假公濟私之計
又其甚者明調州縣經書暗帶空白印冊必使
到局攢造講定冊費方免挑駁開弊竇而滋物
議恐將來悔不勝追矣所請設局一節應毋庸
議 第二條以民欠確數勒限各屬於半月內
開具簡明清摺通送以免書吏從中舞弊自應
如此辦理前據司詳業已通飭遵照惟所議半
月之限若不明定日期仍恐相率耽延應酌限

於十月初十日以前一律查開印摺通送察覈
不得再有遲逾如違撤任參處 第三條以積
年欠款應飭開造花戶細冊連串根一併呈送
此議似欲求其真實而究竟不著痛癢蓋一縣
之花戶不知凡幾而一戶之化名者更不知凡
幾即使編造成冊誰能逐戶挨查紙墨虛糜時
日坐耗迨至

奏期緊迫催促不來又安能守株以待所謂勞而
無益者此也至詳送串根尤覺無謂查版串係

三連騎印其已經完糧截給者只留根底一串
故曰串根若必弔覈及此是查已完而非查未
完者矣殊所未解且卽查覈未完之串而錢漕
銀米奇零細碎之數已不啻繭絲牛毛只能責
令解送府州聽候盤核若恐仍難盡信亦惟有
令其封貯府庫責成巡道抽查或由司委員分
投稽核儘足以臻周密如必悉令解省不特腳
費甚鉅且恐無收藏之地更無寓目之人應毋
庸議 第四條弔查交代三印冊摺及歷任徵

收紅簿此議洵爲得要然其中亦須分別大凡
州縣倉庫錢糧惟交代時可使鬚眉畢現蓋後
任承查前任最爲切已之事而監盤出結會議
乃是居閒之人故三印冊摺最屬可靠至弔串
弔簿非不足以資考證然印在本官之手若果
忍心作弊卽簿串亦難爲鐵憑大抵查存串不
如查紅簿而查紅簿又不如查三印冊今酌令
曾經交代者將三印冊摺送司并議單亦令附
送儘可查悉底蘊不必再弔簿串其交後由本

任接徵未經轉交下任者則將實徵紅簿由該
管府州核定鈐印加結送司如核有不符再行
委員盤串似此層層稽核事簡而法亦周矣
第五條請以官墊民欠造冊專案請豁所稟確
係實情查上屆查辦蠲免經

前督撫院

奏請將官墊民欠分限十年攤賠嗣又恭逢嘉慶
二十五年八月二十七日

恩詔始得造冊準豁此係非常

曠典難以比例然必先有攤賠之

奏而後符于豁免之條若更躡等乞

恩斷難邀準該府州等歷陳墊完之非得已與追賠
之無實濟本部院非不一一深知然究竟可奏
與否尙須與

督部堂暨該司道等反覆熟商不敢豫爲臆斷
所請另行造冊之處姑俟查造到日再行察奪
第六條請以差保繳回離根串票一併入冊
尤不可行查江蘇錢漕積弊莫甚於豫先截串

方禁絕之不暇若再準令繳回更復何所忌憚
且差保人等與本圖花戶素本熟識或花戶懇
託代完或差保豫向兜收往往僅給收條先不
給串卽花戶錢漕早已清完而串票仍在差保
之手者亦復所在多有況串已離根則已完與
未完無可區別安知該差保等不將已給花戶
之串重向收回作爲民欠此端一開其弊不可
勝究所謂教猱升木斷難準行卽使所截之串
實有民欠在內亦不準其查辦以爲濫行截串

者戒 第七條請以輾轉柳墊詳晰奏明一節
亦覺似是而非查各州縣以條銀柳辦漕米以
道項柳解司項以新賦柳補舊賦雖皆實有其
事若官墊民欠一款不能邀準查辦則輾轉遞
柳之處無所用其豫陳如其準查則凡所抵墊
之銀無非存庫之項該府等所謂遞柳之新款
自然在其箇中此時總不能率行豫陳致涉巧
混仰蘇藩司遵照指駁分別核飭辦理如本部
院所準所駁仍未諦當不妨反覆推求以期衷

於一是並此外尚有應酌之處亦卽議覆飭遵
總之實欠在民必應確查全豁官墊民欠祇可
設法徐商該管之道府州皆須認真查核層層
結轉而該司綜覈其成查明一處卽將一處詳
送不可稍有積壓尤須處以鎮靜毋任稍有孟
浪轉滋弊混是所至囑仍候

督部堂批示繳摺存